

## Ikalaata ilya wubhili ilya Yookhani Uwandilo

Umusundikwa uYookhani ásimbile ikalaata ili ifupi ku shibhanza. Ishibhanza shiniishi akushitekha itaawa ilya mwantanda umupiti. Mwi kalaata ili akubhalajizya aBhakilisiti kutinikha indajizyo ya Yeesu ye yikuti bhagananaje. Khabhili akubhasokha kuti bhamanye imanyizyo izyi lenga, ni manyizyo izya wanalyoli uwa Yeesu Kilisiti. Mu zyonti zye bhakwimvwa bhawulandataje uwanalyoli.

### *Uwandilo*

<sup>1</sup> Ine ne musongo uwa shibhanza, inkukusimbila iwe wumwantanda umusaabhulwa, peeka na bhaana bhaakho bhe imbaganile ku wanalyoli. Te neene numwene ne imbaganile, lyoli na bhanji bhonti bhe bhawumanyile uwanalyoli, bhoope bhabhaganile ku wanalyoli. <sup>2</sup> Tubhaganile kunongwa ye itwe niimwe tuwumanyile uwanalyoli, khabhili tutijendeelele kumumanya wiila na wiila.

<sup>3</sup> U-Taata uMulungu nu Mwana waakwe uYeesu Kilisiti, bhatitulolele uwiila ni shisa, na kuutupa uwutengaanu, mu wanalyoli, na mu lugano.

### *Uwanalyoli nu lugano*

4 Násesheeye nhaani, we nimvwa kuti abhaana bhaakho bhamu bhakwikhala mu wanaloli, anza she uTaata uMulungu atulajiziize. 5 Ishi, iwe maayi umuganwa, mu wusimbe uwu, inkukulaabha kuti utinikhaje indajizyo yiila ye yikuti tugananaje. Indajizyo yiniyo, te mpwa khaala, lyoli yi yiila ye twámile nayo kufuma pe twítishile.\* 6 Kuganana kwe kuti, twikhalaje kulandatana ni ndajizyo zya Mulungu. Indajizyo ye mwimvwizye kufuma kuwandilo yikuti mugananaje.

### *Mutabhaposheelaje abhakhopeli*

7 Inkulonga shiniisho kunongwa ye abhakhopeli abhinji bhafumiiye mu nsi, bhe bhatakwikha kuti uYeesu we wu Kilisiti, ayinzile akhabha nu mubhili anzu muntu. Umuntu we akulonga shiniisho, mukhopeli, khabhili mulugu wa Kilisiti.† 8 Mubhe amiiso na bhanaabho, imbombo yiinyu yitakhateeje ulwa khasa, kuti uMulungu akhaabhape vwe vibhakhondeeye ku mbombo yiinyu. 9 Umuntu wowonti we akugalulanya imanyizyo zya Kilisiti, khabhili atakujendelela kulema ziniizyo zye bhamumanyiziize, wanuuyo atali nu wupeeka nu Mulungu. Heelo, wowonti we akujendelela kulema imanyizyo, ali nu wupeeka nu Taata uMulungu, nu Mwana waakwe. 10 Inga umuntu akwinza kukwinyu we atakumanyiza imanyizyo ziniizyo izya Kilisiti, mutakhamuposheele mu nyumba zyinyu,

\* 1:5 1:5 Bhaazya Yookhani 13:34. † 1:7 1:7 Umulugu wa Kilisiti kwe kuti we akudindanjila imbombo ya Kilisiti.

khabhili mutakhamulamushe ngati Mukilisiti wamwinyu. <sup>11</sup> Wowonti we akumulamukha, ali peeka nawo mu mbiibhi zye akubhomba.

*Indamukho izya kumaliilizya*

<sup>12</sup> Indi na mazwi aminji ge nanzaga kubhasimbila, ileelo intakwanza kusimba genego mwi kalataasi nu wiino. Lyoli inkusubhila kwiza kukwinyu kubhayaatila inga tukhalonje we twalolana, pe tukhayiseshela nhaani.

<sup>13</sup> Abhaana bha yilumbu waakho mu lwikho umusaabhulwa, bhakukulamukha.

**ULufingo uLupwa ku ndongo iya Shimalila  
Malila: ULufingo uLupwa ku ndongo iya Shimalila  
(New Testament+)**

copyright © 2020 Wycliffe Bible Translators, Inc.

Language: (Malila)

Contributor: SIL International (in Africa)

All rights reserved.

2020-11-18

---

PDF generated using Haiola and XeLaTeX on 21 Feb 2024 from source  
files dated 29 Jan 2022

3aa8e7a3-f258-5182-ab3f-fbc6f725bb06